



75

CONVENIO DE COLABORACIÓN ENTRE O CONCELLO DE VIGO E A MERCANTIL AVANZA SPAIN, SA., PARA O DESENVOLVEMENTO DE ACCIÓNS DE PROMOCIÓN DAS ILLAS CÍES COMO CANDIDATA A PATRIMONIO MUNDIAL UNESCO

En Vigo, na Casa do Concello de Vigo, a dezasete de agosto de dous mil dezasete

REUNIDOS

Dunha parte, D. Abel Caballero Álvarez, Alcalde de Vigo, designado na sesión do Pleno da Corporación do día 13 de xuño de 2015, e que actúa en representación do Concello de acordo aos artigo 124.4 a) da Lei 7/1985, do 2 de abril, de bases de réxime local (en adiante LRBRL) e o artigo 61.1 a) da Lei 5/1997, do 22 de xullo, de administración local de Galicia (en adiante LALGA).

Doutra parte, D. Valentín Alonso Soroa, Director Xeral da empresa AVANZA SPAIN, SA., en virtude dos poderes que lle foron outorgados por acordo do Consello de Administración da dita empresa de data 28 de febreiro de 2017, protocolizado ante notario mediante escritura pública o 8 de marzo de 2017 e inscrito no Rexistro Mercantil de Madrid o 16 de marzo de 2017, Tomo 34703, Libro 0, Folio 55, Sección 8, Folla M 426267, Inscrición 65.

Ambas partes recoñécense mutuamente capacidade legal suficiente para subscribir o outorgamento do presente convenio e

EXPOÑEN

I. Os municipios, para a xestión dos seus intereses e no ámbito das súas competencias, poden promover actividades e prestar servizos públicos que contribúan a satisfacer as necesidades e aspiracións da comunidade veciñal, segundo o previsto no artigo 25 da Lei 7/1985, do 2 de abril, reguladora das bases de réxime local (LRBRL).

O artigo 25.2. h) da Lei 7/1985, reguladora das Bases de Réxime Local atribúe ás administracións locais competencia en materia de información e promoción da actividade turística de interese e ámbito local. Asemade a Lei 5/1997, de Administración Local de Galicia, no seu artigo 80.2. n) regula como unha competencia local a xestión de actividades culturais e a ocupación do tempo libre e o turismo.

A Lei 27/2013, do 27 de decembro, de racionalización e sustentabilidade da Administración Local, dispón que as competencias atribuídas ás entidades locais pola lexislación autonómica anterior á entrada en vigor da citada Lei (este é o caso, en canto o artigo 80.2 da Lei 5/1997, de Administración Local de Galicia, atribúe aos concellos como competencia propia na letra "n", a xestión de



actividades culturais e de ocupación do tempo libre e o turismo), continuarán exercéndoas elas, rexéndose pola indicada lexislación.

II. Pola súa parte, AVANZA Spain, SA., en adiante AVANZA, é unha empresa adicada á prestación de servizos de transporte terrestre de viaxeiros por carreteira, co obxectivo principal de prestar servizos de calidade que resolvan as necesidades de mobilidade nas comunidades nas que desenvolve a súa actividade. Está conformada, entre outras, polas seguintes empresas: Viguesa de Transportes, SL.-Vitrasa, Auto Res e a Estación Sur de Autobuses de Madrid.

III. O Concello de Vigo na súa apostase compromiso pola conservación, protección e promoción turística e medio ambiental sostible das Illas Cíes, que se atopan no termo municipal de Vigo, promove e lidera a proposta de candidatura do arquipélago como Patrimonio Mundial Natural UNESCO.

A inscrición deste ben na Lista de Patrimonio Mundial presenta, entre outras moitas, as seguintes vantaxes:

- Confírelle á comunidade local a posibilidade de celebrar o ben como un dos sitios naturais más importantes do mundo, coa promoción que iso supón para un dos principais símbolos da cidade de Vigo.
- Converte o ben nun emblema para a rede nacional de áreas e sitios protexidos, propiciando un maior e mellor recoñecemento e unha mellor protección do patrimonio natural.
- Estimula a cooperación de todas as administracións en favor da protección do ben.
- Ofrece a posibilidade de mobilizar fondos e apoio para a conservación e preservación do ben, especialmente, do Fondo Patrimonio Mundial.
- Permite difundir técnicas e prácticas de protección, conservación e xestión do ben.

Nesta firme apostase, dende o Concello de Vigo trabállase formalmente dende o ano 2013 no deseño e desenvolvemento dunha estratexia de candidatura, cun enfoque fortemente participativo.

A estratexia artéllase en tres liñas de traballo fundamentais, baixo as que se agrupan diversas accións que foron deseñadas para a súa posta en marcha no período temporal que, finalmente, ocupe esta iniciativa e que pretende culminar coa inscrición das Illas Cíes como Ben Patrimonio Mundial Natural UNESCO.

Os tres eixos da estratexia de candidatura nesta fase, seguindo as Directrices Prácticas para a aplicación da Convención UNESCO, son as seguintes:

- **Coordinación e colaboración institucional:** co ánimo de conseguir o recoñecemento, implicación e traballo colaborativo entre institucións e representantes políticos do ámbito local, rexional, nacional e internacional, que reforcen e posicionen a candidatura das Illas Cíes.



- **Divulgación e busca de apoios á candidatura:** é preciso conseguir o maior número de apoios, implicacións e participación activa da sociedade e do ámbito empresarial, académico, científico, institucional a prol da candidatura.
- **Reforzo científico-técnico do expediente de candidatura:** ao longo de todo o proceso de candidatura levaranse a cabo accións que proporcionen á candidatura o requerido vigor científico, baixo o que quede perfectamente xustificado o cumprimento dos criterios específicos UNESCO cos que se pretende concorrer.

IV. É importante contar ao longo do proceso de candidatura coa participación e implicación dos axentes económicos, sociais e da sociedade civil, de xeito que se poida acadar a máxima coordinación e colaboración institucional, así como apoios e adhesións no ámbito empresarial, académico, científico, etc. , de modo que se difundan os extraordinarios valores das Illas Cíes.

V. O presente convenio de colaboración entre o Concello de Vigo e a empresa AVANZA enmárcase na necesidade de traballar convxuntamente no desenvolvemento das accións incluídas nos puntos 1 e 2 das liñas de traballo da candidatura.

VI. A empresa AVANZA, propón ao Concello de Vigo o desenvolvemento dunha serie de accións divulgativas e de promoción das Illas Cíes como candidata a Patrimonio Mundial, que se concretan nos pactos do presente convenio.

VII. As administracións Públicas poden celebrar convenios de colaboración con outras administracións ou entes de dereito público e con persoas físicas ou xurídicas de acordo co disposto no artigo 4.1.d) do Texto Refundido da Lei de Contratos do Sector Público, sempre que o seu obxecto non estea comprendido nos contratos regulados nesta Lei ou en contratos administrativos especiais.

VIII. O convenio de colaboración é un instrumento dos que, con carácter xeral e de acordo cos artigos 47.1 LRXSP, 111 TRRL e 4.1.d) e 25 TRLCSP -no referente ás entidades locais específicamente- poden celebrar as administracións públicas con persoas xurídicas privadas, co obxecto de satisfacer os intereses públicos que teñan encomendados.

O artigo 47.1 da Lei 40/2015, do 1 de outubro, de réxime xurídico do sector público establece que las administracións poderán subscribir acordos con efectos xurídicos con suxeitos de dereito privado para o desenvolvemento dun fin común.

IX. Ambas partes consideran que a candidatura das Illas Cíes como Patrimonio Mundial ten un interese público e social, tanto por ser liderado polo Concello de Vigo, onde se atopan as illas, como polo enfoque dado ao proxecto, que conxuga o obxectivo de promoción e conservación do ben co desenvolvemento turístico e medioambiental sostible.

X. O Concello de Vigo e AVANZA consideran que a inscrición na Lista de



Patrimonio Mundial terá numerosos efectos positivos para o ben en concreto e para a cidade de Vigo e a súa contorna, sumando valor engadido á toda a Eurorrexión e conclúen o presente convenio ao fin de regular os termos da colaboración antedita con arranxo aos seguintes

PACTOS

Primeiro.- Obxecto

O presente convenio ten por obxecto o desenvolvemento de accións de difusión, divulgación e promoción das Illas Cíes como candidata a Patrimonio Mundial, contribuíndo con recursos propios de ambas entidades a unha mellor promoción exterior dos extraordinarios valores do patrimonio natural do arquipélago.

Segundo.- Obrigas das partes

AVANZA comprométese a:

- Poñer a disposición do Concello de Vigo dous autobuses interurbanos que cobren a liña Vigo-Madrid, rotulados de forma integral coa imaxe das Illas Cíes e o lema "Illas Cíes: Obxectivo Patrimonio da Humanidade"
- Emitir o vídeo promocional da candidatura nas pantallas interiores de todos os autobuses que realizan a dita ruta Vigo-Madrid.
- Instalar imaxes promocionais das Illas e da candidatura nos asentos de todos os autobuses que fan a ruta Vigo-Madrid
- Rotular de forma integral con imaxes das Illas Cíes o túnel que comunica a Estación Sur de Madrid co metro e co tren de proximidade.

O Concello de Vigo comprométese a:

- Poñer a disposición da empresa AVANZA todo o arquivo gráfico sobre as Illas Cíes do que é titular o Concello de Vigo, co único fin de dar cumprimento ao obxecto do presente convenio.
- Poñer a disposición da empresa AVANZA todo o material documental de carácter promocional sobre as Illas Cíes do que é titular o Concello de Vigo, co único fin de dar cumprimento ao obxecto do presente convenio.

Terceiro.- Obrigas e compromisos económicos

A colaboración entre o Concello de Vigo e a empresa AVANZA, non suporá ningún gasto para o Concello de Vigo. O obxecto principal do convenio de colaboración é o de facilitar a utilización conxunta de medios e servizos de ambas entidades, mellorando a eficiencia da xestión pública e facilitando a realización de actividades de interese público.



O Concello de Vigo non adquiere ningún compromiso de carácter económico. Asemade, as actuacións que se contemplan no convenio e que se prevén executar en favor da candidatura das Illas Cíes non teñen carácter contractual.

Pola súa parte, a empresa AVANZA asumirá a integridade dos custos, se os houbera, que se deriven da execución das accións propostas.

Cuarto.- Vixencia

As actuacións contempladas no presente convenio terán unha vixencia de 2 meses. Cumprido o dito prazo, as partes poderán acordar a súa continuidade, modificación ou substitución, sempre dentro dos límites que establece a Lei 40/2015, de 1 de outubro, de réxime xurídico do sector público.

Quinto.- Seguimento, vixilancia e control de execución do convenio

Ademais das obrigas específicas de ambas entidades, o Concello de Vigo e a mercantil AVANZA traballarán de modo coordinado en todas as actuacións necesarias para xerar os contidos das propostas de divulgación previstas neste convenio. Calquera material divulgativo que se xere en cumprimento do presente convenio deberá contar coa aprobación da dirección do proxecto de candidatura.

Crearase unha comisión se seguimento co obxecto de supervisar a execución das accións, a súa evolución, analizar o seu impacto, realizar propostas e proponer alternativas para dar continuidade aos compromisos adquiridos no convenio.

A Comisión será a encargada de determinar e impulsar as accións específicas que permitan a máxima colaboración entre ambas institucións, cos obxectivos xa indicados.

A comisión estará composta por dous membros, un será designado polo Concello de Vigo e, outro, por AVANZA.

A dita Comisión poderá actuar ben mediante reunións presenciais, elevándose as correspondentes actas, ou polos medios telemáticos e/ou electrónicos oportunos.

Sexto.- Réxime xurídico e xurisdición

O presente convenio ten natureza administrativa, dos previstos no artigo 4.1. d) do Real Decreto Lexislativo 3/2011, do 14 de novembro, polo que se aproba o texto refundido da Lei de contratos do sector público, polo que queda fóra do seu ámbito de aplicación.

Este convenio de colaboración rexerase polas súas propias cláusulas e, supletoriamente, polas normas xerais do dereito administrativo.

As cuestións litixiosas a que poida dar lugar a interpretación, modificación, efectos ou resolución do contido do presente convenio específico de colaboración que



non foran resoltas pola comisión de seguimento prevista no pacto quinto do convenio, someteranse á xurisdición contencioso-administrativa, de conformidade co disposto na Lei 29/1998, de 13 de xullo, reguladora da citada xurisdición.

Sétimo.- Extinción

O incumprimento de calquera das cláusulas do convenio poderá ser denunciado polas partes e, en todo caso, poderá resolverse por calquera das causas previstas no artigo 51 da Lei 40/2015, do 1 de outubro, de réxime xurídico do Sector Público.

Así, de conformidade con canto antecede e en exercicio das facultades de que son titulares cada un dos asinantes, subscriben este convenio, por triplicado, na data que encabeza.

Pola empresa AVANZA SPAIN, SA.
O Director Xeral,

Valentín Alonso Soroa

Polo Concello de Vigo
O Alcalde,

Abel Caballero Álvarez

